

Date – 19/12/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoma’n tun hnaia rampum huap Police hotute intawhkhawmna-a hmasawna tur rawtna zingah Mizoramin a taka kalpui tawh tamtak a nei a ti.
2. Health Minister Pi Lalrinpuii’n Mizoram Universal Health Care Scheme ah inziak lut an pung zel tih a sawi.
3. PHE Minister Prof Lalnilawma’n hunpui lo thleng turah rokhawlhna lian a thleng anih loh chuan tui hnianghnar taka mipuiten an dawn tur thu a sawi.
4. Parliament thlasik thutkhawm chu vawiin khan tiam chin awm lova tihtawp a ni.

<><><>

CM

Chief Minister Pu Lalduhoma’n tun hnaia rampum huap Police hotute intawhkhawmna-a hmasawna tur rawtna zingah Mizoramin a taka kalpui tawh tamtak a nei a ti.

He thu hi Mizoram Police hmunpui, Aizawl Khatla tlanga vawiina Police hotute intawhkhawmna hunah sawiin Pu Lalduhoma chuan Police Modernisation Scheme hnuaiah cheng vaibelchhe 3.18 an hmuh bakah, a belhna additional fund atan cheng vaibelchhe 21.276 chu sorkar laipuiin a pawmsak thu a sawi a, pawisa an hmuh atangin Mizoram Police mamawh tam tak lei tum anih bakah silaimu kah tlang theih loh Bulletproof motor pawh pathum lei an tum thu a sawi bawk.

Chief Minister chuan Mizoram sorkarin police-te hmasawna tur ruahmanna a neih tlangpui tarlangin a langsar zual chu India dan thar BNSS Act 2023-in a phut ang a Directorate of Prosecution dinna tur hriattirna a nih thu sawiin hei hi theihtawp a an bawhzui thu a sawi bawk.

He huna thusawitu dang Home Minister Pu K. Sapdanga chuan, Police hna chu misual hrem tuma beihna i ringawt a nih loh thu leh vantlang nun him leh ralmuang siamna zawk a nih thu a sawi a, tun hma atanga dan bawhchhiatna pangngaite vil reng chung a dan bawhchhiatna tharlam leh tunlai ami hmachhawn thei turin

Mizoram police hotute a chah a, Police hnathawh tha tak avangin ram him an nih phah a ti bawk.

Vawiina Mizoram Police hotute intawhkhawmna hun hi kumin November thla a India ram pum Police Hotute inhmuhkhawm tum 60 na bawhzuina kal zel a ni.



AMC STREET DECORATION

Aizawl Municipal Corporation buatsaih Kawn chei intihsiakna ah Zarkawt Veng chu pakhatna an ni.

Vawiin khan Aizawl Municipal Corporation (AMC) chuan kumin Krismas leh Kumthar Kawn chei intihsiakna lawmman chu AMC Auditorium, Thuampuah sem a ni a, Veng intihsiakna ah Zarkawt chu pakhatna an ni a, Bawngkawn pahnihna niin Chanmari chu pathumna an ni.

Lawmman semna ah hian Aizawl Mayor Pu Lalrinenga Sailo chuan Aizawl mipuite chu faina leh thianghlimna mai bakah khawpui mawina turin nasa zawka hmalak a ngai a ti a, Kawn chei chu khualzin hipna kawngah a pawimawh tih sawiin thalai leh naupangten an ngai hlu hle a ti a, Aizawl khawpui mawina, faina leh mipui nunphung thatna chu hmun dangte hmuhah tarlan zel a pawimawh tih a sawi.



HEALTH MINISTER

Health Minister Pi Lalrinpuii'n Mizoram Universal Health Care Scheme ah inziak lut an pung zel a ti a, a chhawr tawh ten an fak tih sawiin kum 2026 April thla ah inziah luh tharna hun hawn ani leh dawn tih a sawi.

Lungleia Regional Vaccine Store vawiina a hawnna ah he thu hi a sawi a, Health Minister chuan Mizoram Universal Health Care Scheme ah inziak lut an pung zel tih sawiin a chhawr ten man hla an ti hle a ti a, MUHCS tihchangtlun kawngah theihtawpin hma an la zel dawn tih sawiin nakum April thla ah inziah luh leh theih ani dawn tih a sawi.

Pi Lalrinpuii chuan Lungleia Regional Vaccine Centre hawn chu bung thar kaina a nih thu sawiin, Lunglei chhehvel district hrang hrang Lawngtlai, Siaha leh Hnahthial District te'n hmun hnai zawk Lunglei atanga vaccine sem tur an la thei tawh tur chu lawmawm a tih thu a sawi a. Mizoram sawrkarin hmasawwna rualkhai zawk a awm theih nan thu neihna sem zai a kalpui a, hmun hrang hranga sawrkar hma lakna khairual taka kalpui a tumna rah chhuah chu State University hmun tur chungchangah lang tawhin, tunah Regional Vaccine Store chungchangah a lo lang chhuak leh ta a ni, a ti a. Lungleia vaccine dah thatna tur RVS hawn chuan chu harsatna chu a pumpelhtir tur thu a sawi.

Minister chuan Health Department-in damlo enkawl bakah invenna lam nasa takin a kalpui reng tih sawiin, National Health Mission hma lakna zawng zawng leh Directorate of Health Services hma lakna pui ber chu natna laka inven leh hriselna kawng inzirtir (a nih thu a sawi a. Damdawi in tha tehnaa hma sawn turin damdawi

in lian ber atanga sub-centre thlengin a tihfai leh tihthianglim kawngah nasa taka hma lak a nih thu mipuite chu khaw tin leh veng tina sub-centre-te hmang tangkai a, a thlawna damdawi lak tur awmte chhawr tangkai turin a chah a ni.



FISHERIES STATISTICS

Mizoram Fisheries department-te chhinchhiah danin Mizoram chhungah sangha dil 19,809 a awm mek.

Mizoram sorkar chhinchhiah danin sangha dil 19,809 atang hian kum 2023 atanga 2024 chhungin sangha tonn 5720 leh kg 89 tharchhuah a ni a, sangha dil hi a zau zawng a vai a belkhawmin hectare 5888 ang a chhinchhiah a ni bawk.

Voicecast

Mizoram Fisheries Department-te chhinchhiah danin Mizoram chhungah mimal leh society hatchery 10 a mek a hei bakah hian sorkar hatchery 4 a awm mek bawk. Kum 2023-24 chhunga sangha chi tharchhuah zat chu nuai 200 chuang ni a chhinchhiah niin sangha chi Mizoram in a a mamawh zat erawh nuai 471 vel ni a chhut a ni bawk.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



PHE MINISTER

PHE Minister Prof Lalnilawma’n hunpui lo thleng turah mipuiten tui hnianghnar tak an dawn theih nan Department in theihtawp a chhuah a ti a, rokhawlhna lian a thleng anih loh chuan tui hnianghnar taka mipuiten an dawn tur thu a sawi.

Vawiin khan hunpui lo thleng tur atana inbuatsaih nan Public Health Engineering Department changtu Minister Prof. Lalnilawma hovin PHE Department hotute nen Aizawl khawpui tui dinhmun thlir a ni a, Minister chuan Krismas leh Kumthar lo thleng turah tui harsatna a awm loh nan theihtawp an chhuah tih sawiin tun dinhmunah Aizawl khawpui hmar lam kohhran hrang hrang 208-ah leh chhim lam kohhran hrang hrang 138-ah Krismas tui pek an nih tawh thu sawiin, hunpui lo thleng tur atan PHE department chu a inpei a ti a; rokhawlhna lian tham a thleng a nih loh chuan mipuite’n tui hniang hnar tak an neih tur thu sawiin, hlim tak leh

thlamuang taka krismas leh kum thar hmang theuh turin mipuite duhsakna a hlan a ni.



MJA CHARITY

Mizoram Journalists' Association-in Civil Hospital Aizawl leh Zemabawk-a Cancer Hospital-ah MJA Charity Fund atangin tanpuina an hlan.

MJA General Hqrs. hian kum tin Krismas dawn apiangin mi harsate tanpui nan Charity Fund an thawhkhawm thin a, kuminah MJA member thahnem tak bakah pawn lam mi thenkhatin sum hi an thawh khawm a, heta an sum hmuh atang hian Civil Hospital, Aizawl Poor Fund-ah cheng sing 5 leh Zemabawk-a Cancer Hospital Poor Fund-ah cheng sing 7 an hlan a ni.

Civil Hospital Aizawl-a Poor Fund-a sum hlanna inkhawmah hian MJA President, Pu C. Lalrambuatsaiha chuan, Civil Hospital Aizawl chu Mizo mipui nawlpui, hmun hrang hrang awmten an pan khawm, khawsak harsa zawkte'n an pan khawm ber a nih thu a sawi a. He damdawi-in pantute zingah mi harsa tak tak an awm thin a, heng mite chu damdawi-in a thawkten damdawi leinate an tumsak thin tih an hriat thu sawiin, mi harsate tanpuina atan sum hi hlan a nih thu a sawi.

Civil Hospital Senior Medical Superintendent, Dr. Lalchhuankimi pawhin, MJA nen thawh hona tan tak nei a, an damdawi in an hriatsak thin chu lawmawm a tih thu a sawi a, an sum pek chu damlo harsate tan tangkai taka hman a nih tur thu a sawi.

Zemabawk Cancer Hospital-a tanpuina hlannaah Nursing Superintendent, Pi Lalthangpuii Pautu chuan, an damdawi in chu Cancer veite pan khawm an ni a ti a, Cancer chu inenkawl a hautak avangin MUHCS in a daih loh bakah damlo zingah khawsak harsa tak tak an awm thin avangin mi inphalte sum thawhkhawm hmanga inenkawl ve tawk tawk an awm thin tih a sawi.



PARLIAMENT

Parliament thlasik thutkhawm chu vawiin khan tiam chin awm lova tihtawp a ni. Tun tum Paliament thlasik thutkhawm hi ni 19 chhung neih a ni a. Lok Sabha Speaker Om Birla chuan tun tum thutkhawma house rorel hlawk dan chu zaa 111 anih thu sawiin tum 15 an thukhawm a ti a. Rajya Sabha Chairman CP Radhakrishnan chuan darkar 92 chhung house ah tha taka rorel anih thu sawiin an hnathawh hlawk dan chu zaa 121 a tling a ti. Pu Radhakrishnan chuan Vande Mataram hla kum 150 na tlin pualin abika sawihona hun hman anih thu a sawi a. Member 82 laiin an sawi tih a tarlang bawk a ni.

